

Date – 20/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kuminah African Swine Fever (ASF) vawk pulhri puang avangin vawk thi leh suat a la awm lo.
2. Association for Voluntary Blood Donation (AVBD) chuan January thla-ah thisen pek lamah tan a ngai hle niin an sawi.
3. Vawiin hi Member 70 awmna Delhi Assembly inthlan chuh tumte tana inhnudawh theih hun tawp ni a ni
4. Khawvel ngaihven Israel leh Palestinian ralthuam keng pawl Hamas te inkahhai thuthlung chu nimin khan kalpui niin thla 15 chhung induna chu tihtawp a ni.

<><><>

ASF FREE

Kuminah African Swine Fever (ASF) vawk pulhri puang avangin vawk thi leh suat a la awm lo.

Animal husbandry & veterinary department hotute'n an sawi danin kumin January ni khat atanga nimin thleng khan Mizoramah vawk thi a la awm lova, vawk damlo suat a la awm lo bawk. ASF vawk pulhri leng ni nikum tawp lam thlasik intan atang khan a zia-awh chhova, December thla tawp lamah phei kha chuan ni khata vawk thi leh vawk suat awm loh ni a awm chho zel a. Vety department hotute chuan tunah vawk thi leh damlo awm lo mah se vawk pulhri hi thunun vek anga pawm theih a la nih loh thu an sawi a. Khua a lum chhoh a ruahtui tlem a tlak chuan vawk pulhri puang hi awm chho leh nghal thei mai a ni an ti.

(VC)

Mizoram hi ASF vawk pulhri hian kum 2021 bul lam atang khan a chen chilh tawh a, kum tin a puang ta ziah a. Kum 2021 March ni 21 a Lunglei district a Lungsen khua a ASF vawk pulhri a leng tih hmuhchhuah a nih atanga nikum kum tawp lam thleng khan Mizoramah vawk nuai 1, sing 1, sang 1 leh 434 thi leh suat a awm tawh a. Vawk thi zawng zawng hi 62,761 a ni a, vawk 49,267 suat a ni tawh bawk.

ASF vawk pulhri a len tan kum, 2021 khan vawk 33,417 a thi a, 12,568 suat a ni bawk a. A kum leh 2022 khan vawk 12,791 thi-in 11,594 suat a ni a. Nikum hmasa 2023 kha vawk thih tlem ber kum niin vawk 1,039 a thi a, 928 suat a ni. Nikum, 2024 khan vawk thi leh suat zat hi pung chho lehin vawk 14,950 a thih bakah 24,117 suat a ni.

<><><>

EXPLOSIVE SEIZURE

Assam Rifles leh Mizoram Police tangrual chuan Inrinni khan Khatla chuan hnuai kawng kamah puak thei thil engemaw zat an man.

Assam Rifles thuchhuah chuan an thu dawn bawhzui-in an mite leh Police tangrualin lirthei hmanga an rinhlelh an dapna-ah Khatla kawngah hian Inrinni khan gelatin tlawn 30 leh a deh puahna 'detonator' 20 an man a. A neitu ni a puh, Hmingthansanga (kum 42), Hnahthial district ami chu an man bawk. An thil mante leh Hmingthansanga hi Aizawl Police Station-ah an hlan a. Police hian a tul angin an chhui zui dawn a ni.

<><><>

BLOOD DONATION

Association for Voluntary Blood Donation (AVBD) chuan December thla hunpui lai a a thlawna thisen pete chungah lawm thu sawiin January thla-ah pawh tan lak a ngai hle niin an sawi.

AVDB leh Mizoram State AIDS Control Society (MSACS) leh blood bank hrang hrangte chuan kum danga an lo tih tawh thin angin nikum 2024 December thla chungah khan Krismas Pual Thisen Pek a kalpui leh a. Thisen pe tura mipui, a bikin thalaite an ngenna leh sawmna hi mi tam takin ngai pawimawhin, December 2024 thla chungah khan Aizawl district bika blood bank pathumah Krismas pualin thisen unit 1,278 pek a ni a, thisen petute hi mipa 1,032 leh hmeichhia 246 an nih thu AVDB thuchhuah chuan a sawi.

Civil Hospital, Aizawl blood bank tan mi 944-in an pe a, ZMC blood bank-ah mi 216-in an pe a, Synod Hospital blood bank tan mi 118 in an pe bawk. AVBD chuan thisen petute inpekna chu mi dang tan malsawmna a ni a, damlo tam takin damna an chan phah a, thisen petute chungah lawmthu an sawi a ni.

Hetih lai hian, kum tawp lam Krismas vuakvet velah pawl hrang hrangin tih tur an ngah thin a. Kum thar tir lam January thla hi thisen pe thin pawl hrang hrangte hruaitu insiksawi lai, kum khat chungah hmalakna tur hrang hrangte duan hun lai a nih avangin kumtin January thla leh December thlaah thisen pek a tlahniam thin a, pawl hminga thisen pek a tlem zual thin.

Kumin 2025 January thla hman mekah pawh thisen pek a tlahniam hle a, thla dang zawng aiin pawl hminga thisen pe an tlem em em niin an sawi a. Chuvang chuan tunlai hian thisen mamawh an awm pawhin blood bank-a dah khawl sa lak mai tur a awm mang lo a, thisen mamawhte'n thisen petu tur an zawn a ngai tlangpui a ni. Hetiang hi tun dinhmun a nih avangin AVBD chuan institution thenkhatte bia-in, thisen pe turin a ngen ngawt mai a. An ngenna ngai pawimawha thisen pe tura inruahman mek institution-te chungah an lawm tak zet tih AVBD-a hruaitute chuan an sawi a ni.

<><><>

CNF/CAN DISOWNS LEADER

Myanmar Chin state a hel pawl hlun ber Chin National Front (CNF) leh an silai keng pawl (Chin National Army) CNA te chuan tun hnai a Mizoram

Police te'n ralthuam an manna a an man tel an pawl hruaitu chu pawl hriatpui a ti a nih loh thu an sawi.

CNF a Vice Chairman-one Pu Thang Ning Kee chuan Mizoram Police te'n Ningani a Mamit district a ralthuam tawlh kaihnawih mi 5 an man zinga pakhat chu an pawl thuneitu sang central executive committee a member Bil Cung a ni ngei tih an pawm thu a sawi a. Chutih rualin he a thiltih hi CNF/CNA chuan an hriatpui lo niin a sawi a, Police-in an man hnu-ah chauh hetiang thilah hian a lo inhnawih ve tih an hria niin a sawi a ni. Kar kalta Nilaini (January ni 15) khan Mizoram Police-te chuan Bangladesh ramri hnaih Mamit district a Saithah khaw dai-ah AK-47 rifle 6, a mu 10,050 leh magazine 13 an man a. Hemi kaihnawih hian mi 5 an man a. Bil Cung bakah hian Myanmar mi dang 2, Chakma 1 leh Mizoram mi 1 an man a ni. Police-in tun dinhmuna an chhui china a an hmuh dan chuan he CNF/CNA hruaitu bakah hian Bangladesh a Chakma hel pawl United People's Democratic Front- P (UPDF-P) te an inhnawih a, ramdang 2 ralthuam inhralh tawna hmunah Mizoram leilung an hmang a ni an ti.

UPDF-P hi kum 1972 a din Chakma hel pawl Shanti Bahini a ralthuam keng pawl Parbatya Chattagram Jana Samhati Samiti (PCJSS), atanga peng leh pawl a ni a. Kum 1997 a Shanti Bahini leh Bangladesh sorkar inremna thuthlunga lungawi lova pawl hran din a hel zui an ni a. Kum 2010 a Lengte khaw bula AK-47 rifle 33, LMG 1 leh US siam light browning rifle pakhat an man pawh kha UPDF-P te tawlhruk ni a hriat a ni.

Nilaini a ralthuam man chungchangah hian West Phaileng Police Station-ah thubuai ziahluh a ni a. Chhui zui mek a nih avangin an mimante hming hi an puan a la rem loh thu Police hotute chuan an sawi a ni.



REFUGEES IN LAWNGTLAI

Myanmar buai avanga sahimna zawnga ralhlante tana Lawngtlai bul, Multi Modal kawng sir deuh mai-ah Kanaan Refugee Camp chu kum 2021 khan din a ni a, tunah hian chhungkaw 72 awmin, an vaiin mi 365 an awm mek, He camp-ah hian hruaitu pasarih awmin chu'ngte chuan camp nunphung leh inrelbawl dan an enkawl thin.

Camp hruaitute zinga pakhat Pu Thi Ming hnen atanga thu dawn danin naupangte chu school kaltir an ni a, puitlingte erawh nitin ei leh bar zawngin kut hnathawkin an inhlawh a thina, hna remchang apiang thawkin an eitur lei na'n leh chakkhai dang lam nan an hlawhchhuahte an hmang thin a, chhawmdawlina leh tanpuina a khat tawkin sawrkar, pawl leh mimal hnen atanga an dawn thin thu a sawi a. Myanmar ram buai mek a reh hunah an let leh tur thu a sawi.

Kanaan Refugee Camp hi Chandmary Lawngtlai khawtlang enkawlina hnuaiah awmin, a theih anganga vilin, an hna thawh tur te pawh khawtlang hruaitute'n an ngaihvensakin, damloh leh harsatna dang an tawh chang paw'n Chandmary khawtlang chu an tlukluhna ber a ni.

Sorkarin a chhinchhiah danin tun dinhmuna Lawngtlai District ah Raltlan 8,020 awm mekin, heng zinga 5,922 chu Myanmar atanga lo lut an ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



DELHI ASSEMBLY

Vawiin hi Member 70 awmna Delhi Assembly inthlan chuh tumte tana inhnudawh theih hun tawp ni a ni a. Delhi Assembly inthlanah hian candidate 719 an awm a. Nomination thehluh 1522 zingah 477 chu hnawl an ni a. Thlaleh ni 5 ah vote thlak a ni ang..



ISRAEL HAMAS

Khawvel ngaihven Israel leh Palestinian ralthuam keng pawl Hamas te inkahhai thuthlung chu nimin khan kalpui niin thla 15 chhung induna chu tihtawp a ni. Israel chuan Hamas ten an mi leh sa an man mi 3 chhuah turte an dawng tawh tih an sawi a. Prime Minsiter Benjamin Netanyahu chuan an security ten an enfiah mek tih social media ah a tarlang a. Ni 7 lo awm tur chhungin hmeichhe dang 4 pawh chhuah an ni dawn a ti bawk.



PARLIAMENT BUDGET SESSION

Parliament Budget session chu tun thla ni 31 ah tan a ni dawn. President Droupadi Murmu-i chuan session tanni January ni 31 hian Lok Sabha leh Rajya Sabha member thukhawm hmaah thu a sawi dawng a. Union Budget chu February ni 1 ah pharh a ni ang. Parliament Budget session hi thawh hniha neih tur a ni a, a thawhkhatna hi January ni 31 atanga Febraury ni 13 thleng neih a ni ang a, a thawh hnihna hi March ni 10 atanga April ni 4 chhungin neih leh a ni ang.

